

Johns Hopkins Malaysia tarikan luar biasa: PM

Program perubatan di Serdang tumpuan rantau lain



NAJIB menunjukkan 'The Dean's Special Recognition Award' yang disampaikan Edward (tengah) pada majlis penubuhan Institut Pendidikan Perubatan Antarabangsa Johns Hopkins Dr Mohan Swami di Universiti Johns Hopkins di Baltimore, semalam.

WASHINGTON: Pembukaan institusi pengajian dan penyelidikan perubatan Universiti Johns Hopkins di Malaysia September ini dijangka mendapat sambutan hebat di rantau itu, kata Datuk Seri Najib Razak.

Perdana Menteri berkata, institut yang akan ditubuhkan di Serdang itu dijangka menarik penuntut bukan saja dari negara di rantau itu, malah dari Asia Barat dan benua kecil India.

"Saya yakin program perubatan Johns Hopkins ini akan menjadi satu tarikan luar biasa," katanya pada satu majlis sempena penubuhan Institut Pendidikan Perubatan Antarabangsa Johns Hopkins Dr Mohan Swami di Universiti Johns Hopkins di Baltimore, Maryland, kira-kira sejam perjalanan dari sini.

Turut hadir Menteri Pengajian Tinggi, Datuk Seri Khaled Nordin; Duta Malaysia ke Amerika Syarikat, Datuk Seri Dr Jamaluddin Jarjis; ahli perniagaan, Tan Sri Mohan Swami dan ketua pegawai eksekutif universiti itu,

Edward D Miller.

Program perubatan Johns Hopkins itu adalah hasil kerjasama dengan Universiti Perdana yang menawarkan hospital pengajian swasta yang mempunyai kemudahan perubatan kelas pertama. Ia dibina di Serdang oleh kumpulan Chase Perdana diterajui Mohan.

Najib berkata, beliau gembira kerana hospital itu akan mempunyai tenaga kerja bukan saja dari Baltimore, malah dari seluruh dunia.

Perdana Menteri berkata, pentadbiran beliau sudah merangka pelan untuk mencari dan menggalakkan rakyat Malaysia yang bekerja di seberang laut untuk pulang berkhidmat di Malaysia, pada masa sama, meningkatkan usaha ke arah latihan kemahiran.

"Inilah sebabnya saya secara peribadi amat teruja dengan perkongsian ini," katanya.

Johns Hopkins terkenal kerana merintis pelbagai hasil bidang perubatan antaranya penggunaan sarung tangan getah untuk pembedahan.

"Ini memberi kesan positif ke-

pada industri getah di Malaysia yang kini menjadi pengeluar dan pengeksporth terbesar sarung tangan getah untuk perubatan," kata Najib.

Beliau berkata, penubuhan kampus itu di Malaysia akan mendorong lebih ramai graduan terbaik dari universiti di Malaysia untuk kekal di negara sendiri kerana mereka kini berpeluang mengikuti pengajian dari sekolah perubatan terbaik di dunia dan juga menjalankan penyelidikan klinikal lanjutan tanpa perlu ke luar negara.

Mohan pula berkata, pengambilan pertama 100 penuntut adalah pada September ini dan mereka ditempatkan di kampus sementara berdekatan ibu pejabat MARDI sehingga kampus tetap siap pada 2013.

"Kita akan mengambil 75 penuntut dari Malaysia. Seramai 50 pemegang biasa JPA (Jabatan Perkhidmatan Awam) dijangka belajar di universiti kami," kata Mohan yang juga Canselor pertama Universiti HIHT di India pada 2008.-BERNAMA

PERDANA LIBRARY
PERDANA LEADERSHIP FOUNDATION
NEWSPAPER CLIPPING

Berita Harian	20/15/2011
Newspaper	Date

